



*SEECP sastanak ministara vanjskih poslova
Beograd, 14. juni, 2012. godine*

*Obraćanje dr. Zlatka Lagumdžije
zamjenika predsjedavajućeg Vijeća ministara i ministra vanjskih poslova Bosne i
Hercegovine na SEECP sastanku ministara vanjskih poslova*

Gospodine predsjedavajući,
Poštovane kolege ministri
Vaše ekscelencije,
Dame i gospodo

Na početku obraćanja želim da vas pozdravim u ime Ministarstva vanjskih poslova Bosne i Hercegovine i da izrazim iskrenu zahvalnost domaćinu našeg današnjeg skupa, Ministarstvu vanjskih poslova Srbije na srdačnoj dobrodošlici.

Dvanaest zemalja učesnica u Procesu saradnje u jugoistočnoj Evropi čiji predstavnici su prisutni danas, mogu biti ponosni na svoj minuli rad u proteklom periodu. Ideja zbog koje smo se i okupljali ne samo ovdje nego i na svim sastancima regionalnih inicijativa koji su održavani u proteklom periodu, možemo potvrditi da je u potpunosti uspjela.

Regionalna saradnja vodi ka regionalnoj integraciji koja ima svoju ekonomsku, bezbjednosnu i političku komponentu. Jasno je da regionalna saradnja nosi dugoročne dobiti i to u smislu prevazilaženja nekih neutemeljenih otklona prema susjedima, uspostavljanja obostranog povjerenja i unaprijeđenja naših odnosa. Ona je posljednjih godina u značajnoj mjeri unaprijeđena. Iako se pod regionalnom saradnjom često podrazumijevaju procesi evropskih integracija, ova saradnja ne smije biti doživljena samo kao zahtjev EU već kao potreba regiona kojoj je značajan podsticaj i mehanizme pružila i pruža upravo EU.

Poštovane kolege,

Ovdje u Beogradu obilježavamo još jednu godinu rada *Vijeća za regionalnu saradnju*, odnosno, aktivnog i uspješnog rada regionalnih eksperata u Sekretarijatu čije sjedište je, kao što znate, u našem Sarajevu. Siguran sam da dijelim vaše mišljenje kada kažem da sa zadovoljstvom možemo preporučiti Samitu šefova država ili vlada država SEECP-a usvajanje *Godišnjeg izvještaja* generalnog sekretara RCC-a koji je velikim dijelom ispunio zadatke iz *Strategije i programa rada RCC-a za 2011-2013. godinu*. Strarateški program RCC-a počeo je da se iskazuje saradnjom na konkretnim projektima, te smo stoga spremni da damo punu podršku novom generalnom sekretaru, gospodinu Goranu Svilanoviću, koji će, vjerujemo, nastaviti dogovorenim putem ispunjavanja zadatih ciljeva.

Dame i gospodo,

Opredijeljeni smo da 2012. godinu učinimo godinom progresa u Bosni i Hercegovini naročito kada je u pitanju proces približavanja EU. Nema te političke situacije, a usuđujem se da kažem ozbiljnijeg političkog preispitivanja kojim putem bi trebalo da idemo prema budućnosti, koja bi mogla da nas spriječi da nastavimo tim putem.

Suprostavljamo se i suprostavićemo se svakom antidejtonskom djelovanju na tom putu, ma sa koje strane političkog života ono dolazilo. Istovremno, spremni smo da damo novi snažan podsticaj promjenama koje nas vode ka Evropi. U tom smislu, u Bosni i Hercegovini su načinjeni značajni pomaci u posljednjih nekoliko mjeseci, poput usvajanja Zakona o državnoj pomoći i popisu stanovništva i postizanja dogovora o značajnim pitanjima državne i vojne imovine.

Najvažniji prioritet za Bosnu i Hercegovinu ostaje implementacija presude Evropskog suda za ljudska prava u slučaju Sejdić-Finci, kako bi konačnim stupanjem na snagu Sporazuma o stabilizaciji i pridruživanju BiH mogla biti u poziciji da, nadamo se, uskoro preda kredibilnu aplikaciju za dobijanje statusa zemlje kandidata za članstvo u EU u čemu očekujemo snažnu podršku svih zemalja, posebno susjeda i zemlja iz regiona.

Dame i gospodo,

Upravljanje Bosnom i Hercegovinom i dalje uključuje međunarodno prisustvo sa izvršnim mandatom. Stabilno političko okruženje je najvažnije od svih ovih pitanja. Usvajanjem evropskog pristupa dijalogu i kompromisu, te usmjeravanjem na agendu EU, država će moći da postepeno pređe iz faze zastoja i sukobljavanja u fazu saradnje, te da se oslobodi međunarodne supervizije i okrene svojoj budućnosti u EU.

Na kraju želim istaći da smo učestvujući kako na redovnim godišnjim Samitima SEECP-a tako i na drugim sastancima najviših političkih predstavnika država regiona uspjeli sačuvati duh dobrosusjedske saradnje i dogovoriti buduću ulogu SEECP-a u koordiniranju regionalne saradnje, a posebno zajedničko djelovanje prema procesu proširenja na zemlje regiona.

Želim na kraju da još jednom čestitam dosadašnjoj državi predsjedavajućoj SEECP-om na uspješnom okončanju jednogodišnjeg mandata a novoj mnogo uspjeha u daljem djelovanju i planiranim aktivnostima na regionalnom planu.

Hvala na pažnji !